

Nowodhow an Seythen

24/03/2009

Konsel Karrek a wrug gront a £312,000 rag ewna ha mentena an Hel rag Kernow yn Truru. An arhans a dheu wosa an *West Briton* dhe dhylllo derivas diskeveryys a-gensow a lever bos studh an drehevyans pur dhrog. Kynth yw an Hel rag Kernow le meurgerys gans skodhyoryon an artys y'n Dhugeth, gans meur a doknys gwerthys pub seson, nyns yw hemma lowr rag tyli kostys mentena an drehevyans. Herwydh an derivas, yth hevel nag o pub rann nowythheans an drehevyans y'n bledhenyow 90 gwrys yn ta hag yma hwath lies problem strethurek hirdermyn. An Hel rag Kernow yw alusen govskrifys hag a dhegemmer moy es £400,000 pub bledhen yn grontys dhyworth Konsel Karrek, Konsel Kernow, ha Konsel an Artys rag gweres gans kostys hy mentena.

Astel-vordardha nowyth ha mas rag an kyrhynnedh veu lonchys war Dreth Fistral yn Tewyn Pleustri y'n seythen yw passyes. An astel-vordardha Eden yw sewyans a gesoberyans an Edenva ha tri kowethas aral dhyworth Kernow. An gesoberoryon re strivyas dhe wul astel las orth pris kesstrifus heb dhevnydhya kemmys a askorasow menoyl. Moy es 50% an stoff usys y'n astel a dheu dhyworth pennfentynnyow nowedhadow. Y hyllir gwerthi astel-vordardha Eden personelhes war wiasva an Edenva, gans prisyow ow talleth orth £365.

Gwithysi dan a vatalyas 15 tansys a-dreus Kernow yn 24 our dy' Gwener ha moy hwath dy' Sadorn. An kreslu a grys bos rann an tansysyow ma enewys a-borpos. Towl-loskoryon a worras tan yn kerri yn Sen Ostel ha Sen Colum, yn privedhyow poblek yn Porth Ia, hag yn gwedh hag atal yn Hellys. Ynwedh y kemeras eythen tan yn Victoria, Demelza, ha Goon Belowda ogas dhe'n Garrek yn Konteth Restormel hag yn Goon Helhi war an Lysardh. Tanluyow Sen Dennis, Sen Colum Veur, Sen Ostel, Bosvenegh ha Tewyn Pleustri a weresas ow tifeudhi an tansysyow. Yn West Dewnans ynwedh yth esa tansysyow eythen dres an pennseythen. Hwath yma an kreslu ow hwithra an tansysyow ma rag diskudha a pens i ynwedh enewys gans towl-loskoryon.

Perhenogyon Ostel Chimorva yn Marhas Yow re beu charjys yn ken laha civil gans disfaverans awos keveryans reydhek, wosa i dhe dhenaha ri chambour dewblek dhe gopel gey. Martyn Hall ha Steven Preddy, dewdhen yn partneredh civil, re ragarghsa chambour dewblek dre bellgowser yn mis Gwynngala, mes pan dhrehedhsons an ostel, an menystrer a leveris dhedhans na allas ev kewera an ragarhas awos polici an ostel. Peter ha Hazelmary Bull, perhenogyon an ostel, a lever na vynnons ri chambours dewblek saw dhe goplow demedhys kenreydhek awos aga fydhyans Kristyon.

Ha'n re ma yw oll an nowdhow rag an seythen ma. Mar pleg goslowewgh orthyn nessa seythen rag pella derivadow a'n pyth usi ow hwarvos yn Kernow!